

Inatsisissatut siunnersuummut nassuiaatit

Nalinginnaasumik nassuiaatit

1. Aallaqqaasiut

2022-mut aningaasanut inatsimmut atatillugu avataasiorluni raajarniarnermi qaleralinniarnermilu akitsuutit, akitsuutillu qaffasinnerpaaffiat allanngortinneqassasoq aalajangerneqarpoq.

Taamattaaq sinerissap qanittuani qaleralittanut akitsuutip 0 kr.-mut, akillu 0 procentianut inissinneqarnissaa aalajangerneqarpoq. 2022-mut aningaasanut inatsimmut konto pingaarnermut 24.11.25 Qaleralinnut akitsuut oqaasertaliussat allanngortinneqarneratigut, allannguut pivoq. Akitsuuteqartitsinnginneq taanna taamaallaat 2022-mut attuuttussaavoq. 2022-mi ukiakkut ataatsimiinnermi Kalaallit Nunaanni aalisarnermi pisarineqartut isumalluutunik atuinnermut akitsuutaat pillugit Inatsisartut inatsisaata allanngortinneqarneranik Inatsisartut inatsisaannut siunnersuummik Inatsisartut 2022-mi ukiakkut ataatsimiinneranni saqqummiussinissaq ilimagineqartoq oqaasertaliussani allassimavoq.

2022-mi sinerissap qanittuani qaleralittanut akitsuummik appaaneq, aalisakkanik avammut tunisinermi isumalluutunik atuinnermut akitsuummik qaffaanikkut aningaasalersorneqarpoq. Qaffaaneq aalisarnermi pisarineqartut isumalluutunik atuinnermut akitsuutaat pillugu inatsimmik allannguinnikkut piviusunngortinneqarpoq. (Inatsisartut inatsisaat nr. 24, 1. December 2021-imeersoq) Allannguinerup akitsuutip 5 procentimit 5,5 procentimut qaffanneqarnera kiisalu akitsuutit annertunerpaaffiata 17,9 procentimit 18,4 procentimut qaffanneqarnerat nassataraa, piffissamili ikaarsaarfiusumi ukiumi ataatsimi (tassa 2022-mi) saarulliit, kullerit, sejit, kullerit, suluppaakkat sinerissallu qanittuani raajartat akitsuummik akitsuutillu qaffasinnerpaaffianik qaffaanermit ilaatinneqanngillat. 2022-p ingerlanerani siunnersuummik saarullinnik, kulleridik, sejinik suluppaakkanillu kiisalu sinerissap qanittuani raajanik pisanit akitsuutunik annikilliliinerup ataavartunngortinnissaanut 2022-mi siunnersuummik saqqummiussisoqarnissaa ilimagineqartoq, allannguutissatut siunnersuutip nassuiaataani allassimavoq.

Siunnersuutikkut sinerissap qanittuani qaleralittat akitsuuserneqartarunnaarallarnerat ataavartunngortinneqarpoq, soorluttaaq saarullinnut, kullerikut, sejinut suluppaakkanullu akitsuummik appaagallarneq ataavartunngortinneqartoq. Akerlianik sinerissap qanittuani raajartanut akitsuummik appaagallarneq nangingneqanngilaq, taamaaliorneq inatsisiliorluni piareersaasiornermi ulapinnerup nalaani appaanerup paatsuinikkut pisimanera tunngavissaatinneqarpoq.

2. Siunnersuummi immikkoortut pingaarnerit

Saarullinnut, kullerinit, saarulliusaanut suluppaakkanullu akitsuut akitsuutillu qaffasinnerpaaffia atuuttoq ukiuni aggersuni atuutsiinnarneqassasoq siunnersuutigineqarpoq.

Taamattaaq 2022-mi sinerissap qanittuani qaleralittanut akitsuut akitsuutillu qaffasinnerpaaffia atuuttoq ukiuni aggersuni atuutsiinnarneqassasoq siunnersuutigineqarpoq.

Allanguut akitsuutit aqqissugaanerisa ullumikkutut isikkoqartiinnarneqarnissaanik siunertaqarpoq, taamaalilluni akitsuutit annertussusaat akitsuutillu qaffanneqassanatik.

3. Pisortanut aningaasaqarnikkut allaffissornikkullu kinguneqaatissat

Siunnersuut saarullinnut, kullerinit, saarulliusaanut suluppaakkanullu akitsuusiussap akitsuutillu qaffasinnerpaaffiata avataasiorluni raajartanut qaleralittanullu qaffaassutit malissagaluarpagit, kiisalu sinerissap qanittuanut aalisarnermi qaleralittanut akitsuutit eqquteqqinneqassagaluarpata, akitsuutitigut iluanaarutissanik 17,6 mio. kr.-nik annikillisisassasoq ilimagineqarpoq. Tassani 1,6 mio. kr.-t saarullinnut 16 mio. kr.-llu sinerissap qanittuani qaleralittanut attuumapput.

Kullerinit, saarulliusaanit suluppaakkanillu akitsuut annikitsuinnaareerpoq, taamaaginnassasorlu ilimagineqarluni.

Siunnersuut pisortanut allaffissornikkut kinguneqaatissaqanngilaq.

4. Namminersorlutik inuussutissarsiortunut aningaasaqarnikkut allaffissornikkullu kinguneqaatissat

Siunnersuut suliffeqarfinnut avataasiorluni saarullinniartunut, suluppaagarniartunut, kulleriniartunut saarulliusaarniartunut, kiisalu sinerissap qanittuani qaleralinnianut aningaasaqarnikkut pitsanngoriartitsissasoq ilimagineqarpoq.

5. Avatangiisinut, pinngortitamut inuiaallu peqqissusaannut kinguneqaatit

Siunnersuut avatangiisinut pinngortitamullu kinguneqaatissaqanngilaq. Siunnersuut aamma inuiaat peqqissusiannut tunngatillugu kinguneqaatissaqanngilaq.

6. Innuttaasunut kinguneqaatit

Siunnersuut innuttaasunut kinguneqaatissaqanngitsoq nalilerneqarpoq.

7. Kinguneqaatit pingaarutillit allat

Siunnersuut allanik kinguneqaatissaqanngitsoq nalilerneqarpoq.

8. Oqartussanut, kattuffinnut il.il. tusarniaaneq

Siunnersuut piffissami 25. maajimit 20. juni 2022-mut soqutigisaqartunut ukununnga tusarniaassutigineqarpoq:

Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Grønlandske Advokater, SIK, Sulisitsisut, NUSUKA, KNAPK, Naalakkersuisut Siulittaasuata Naalakkersuisoqarfia, Inuussutissarsiornermut Niuernermullu Naalakkersuisoqarfik kiisalu Aalisarnermut Piniarnermullu Naalakkersuisoqarfik.

Taamatuttaaq siunnersuut piffissami siuliani taaneqartumi nittartakkakkut tusarniaavimmi www.naalakkersuisut.gl kikkunnit tamanit takusassanngortinneqarpoq.

Tusarniaanermi akissutisiani pingaarnert ilanngussaq 1-imi tulliuttumi allaaserineqarlutillu oqaaseqarfigineqarput.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut aamma 3-mut

Sinerissap qanittuani qaleralittanut akitsuut kiilumut 0 kr.-nut akillu 0 procentianut aalajangersarneqassasoq siunnersuutigineqarpoq.

Nr. 2-mut

§ 6, imm. 1-imi saarullinnut, kullerinit, saarulliusaanut suluppaakkanullu akitsuut 5 procentimut inissinneqassasoq, kiisalu § 6, imm. 3-mi taaneqareersunut akitsuutip qaffasinnerpaaffissaa 17,9 procentinut inissinneqassasoq siunnersuutigineqarpoq.

Sinerissap qanittuani raajarniarnermut atatillugu pisarineqarlutik tunineqartut Inatsisartut inatsisaanni § 7-imut ilaatinneqassasut, avammullu tunineqartussatut umiarsuarmi tunisassiarineqartut inatsimmi § 6, imm. 1-imut ilaatinneqassapput. Taamaalilluni taamatut aalisarnermik ingerlatsineq allannguutinit kalluarneqanngilaq.

§ 2-mut

Inatsisartut inatsisaat ulloq 1. januar 2023 atuutilissasoq siunnersuutigineqarpoq.

Ilanngussaq 1

Tusarniaanermut allakkiaq

KNAPK-mit, Sulisitsisunit, Qeqqata Kommunianit Aalisarnermullu Piniarnermullu Naalakkersuisoqarfimmit tusarniaanermut akissutinik tigusaqartoqarpoq.

Sinerissap qanittuani saarullittanut, kullerertanut, sejnik pisanit suluppaagartanillu akitsuut 5 procenti atorunnaarsinneqassasoq, iluanaarutinillu annaasat avataasiorluni ingerlatanut akitsuutit qaffanneqarnerannik taarserneqassasoq, KNAPK-p siunnersuutigaa. Sinerissap qanittuani pisanik tunisinermi akit appasinnerat tunngavilersuutigineqarpoq. Tunisinermi akit appasinnerat kiisalu tunitsivinni naammassisinnaasat appasinnerat aalisagaqatigiiaat taakku tunineqarnerisa killeqarnerannut patsisaavoq. Orsussap nunarsuarmi akiata qaffannerata nioqqutissat allat akiisa qaffannerat nassataraa, tamannalu sinerissap qanittuani aalisarnermi isaatitanut ilungersunartorsiortitsivoq. Avataasiorluni aalisarnermi atugassaritinneqartut pitsaavallaarput, isertitaallu sinerissap qanittuani akornusiisumik equngavallaarput. Taamaammat avataasiorlutik aalisartut kisimik aalisarnermi pisarineqartut isumalluutinik atuinermt akitsuutaannut akiliisinneqartalertuuppata tamanna naapertuutiinnassasoq KNAPK isumaqarpoq. COVID-p nunarsuaq tamakkerlugu tunillaassuunnerani inuiaqatigiit kalaallit annertuumik ilungersunartorsiortinneqarput, Ukrainemilu sorsuunnerup aningaasarsiorneq unitsissanngippagu, sinerissap qanittuani aalisarneq akitsuutinik suli appaavigineqarnerusariaqarpoq, atugassarititaasummi pitsaanngitsorujussooreermata.

Saarullinnut suluppaakkanullu sinerissap qanittuani pisanik tunisinermi akitsuutinut akiliisitsisoqarneq ajorpoq, takuuk inatsimmi § 3, imm. 4, tassani aalisakkanut taakkununnga akitsuut 0 kr.-nut aalajangersarneqarpoq.

Aningaasartutit siunissami qaffassinnaanerannut tunngasut Sulisitsisut maqaasivaat. Orsussamut aningaasartuutit marloriaatinnguinnanngillat, aalisarnermilu atortorineqartut tamarluinnarmik akitsoriartorput. Taamaammat pissutsit nutaanngornerini aalisarnermik inuussutissarsiortut suli unammillersinnaassuseqaqqullugit, aalisarneq tamaat ataatsimut isigalugu akitsuutit appartinneqarnissaat eqqarsaatigineqartariaqarpoq.

Danmarkimi nunanilu allani ilaatigut inuussutissat akiisa qaffannissaat ilimagineqarpoq. Taamaammat aalisakkanit nerisassiat akiisa aamma qaffannissaat ilimagineqartariaqarpoq. Taamaassappat kalaallit aalisartitseqatigiiffiisa kaaviiartitamik qaffannissaat ilimagisariaqassavaat, taamaannaratalu ingerlatseqatigiiffiit orsussamut il.il. aningaasartuutiginerusaat arlaatigut illuatungilerneqassapput. Taamaammat aningaasaqarnerup ataatsimut ineriartorneranik sukumiisumik nalilersuinani akitsuutit appartinneqarnissaannik oqallinnissaq pissusissamisuunngilaq.

Tusarniaanermi akissuteqartut allat siunnersuummut oqaatigisassaqarnatilluunniit tusarniaanermut akissuteqanngillat.

Siunnersuutip inatsimmut atuuttumut sanilliunnera	
<i>Oqaasertat atuuttut</i>	<i>Siunnersuut</i>
	§ 1 Kalaallit Nunaanni aalisarnermi pisarineqartut isumalluutininik atuinermut akitsuutit pillugit Inatsisartut inatsisaat nr. 46, 23. november 2017-imeersoq, kingullermik Inatsisartut inatsisaatigut nr. 13, 27. november 2018-imeersukkut, Inatsisartut inatsisaatigut nr. 8, 19. november 2021-meersukkut kiisalu Inatsisartut inatsisaatigut nr. 24, 1. december 2021-meersukkut allanngortinneqartoq imatut allanngortinneqassaaq:
	1. § 5-imi nutaatut immikkoortoq 3-tut ilanngunneqassaaq: “ <i>Imm. 3.</i> Sinerissap qanittuani qaleralittanik Kalaallit Nunaanni tunitsivinnut tunisassiorfinnulluunniit pisanik suliarineqartussanik tunisinermi, akitsuut kiilumut 0 kr.-uvoq.”
	2. § 6 kingorna ilanngunneqassaaq: “ § 6 a. Saarullinnut, kullerinit, saarulliusaanut suluppaakkanullu § 6, imm. 1 malillugu akitsuut 5 procentiuvoq. <i>Imm. 2.</i> Saarullinnut, kullerinit, saarulliusaanut suluppaakkanullu § 6, imm. 3 malillugu akitsuut 17,9 procentiuvoq.”
§ 7. <i>Imm. 4.</i> Qaleralinnik tulaassinermi, sinerissami qanittumi aalisarneqartut, akitsuutip akiusup 4 procenterissavaa.	3. § 7, imm. 4, ima oqaasertalerneqassaaq: “ <i>Imm. 4.</i> Sinerissap qanittuani qaleralittanik tunisinermi akitsuut akip 0 procenteraa.”
	§ 2 Inatsisartut inatsisaat ulloq 1. januar 2023 atuutilerpoq.